



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

10. Kalenderwoche – ab 7. März 2010

Isch bin e Einsiedlor!

Nee, es is ja heidzudaache nisch grade seldn, dass eenor sein Job vorliern dud. Es is ehor seldn, wenn de noch nie dein Job vorlorn hasd. Es soll Leide gähm, die hamm schon längsd offgegähm, nochma off een Job zu hoffn. Die moddln noch so bißl rum un wardn, bisse Rende grischn.

Ibrischens - Job vorliern, das is ooch so ähnlich, wie wenn de lange Jahre vorheirated warsd un bledzlich un unerwarded sachd dir dei Ehebardnor, dassor nischd mähr von dir wissn will. Un das meeschlichsd gurz vor Weihnachdn - als Iborraschung! Beng aus finido!

Un da haddesde disch jahrelang geschundn un gemiehd un... ja, un mansch eene Geleeschnheid hasde aus Dreuischkeed ausgelassn. Dann schdehsde bledzlich da un kennedesd dir in Arsch beißn, dass de nisch mid dor een odor annorn ins Bedde gehubbd bisd. Nee, du bisd dreu gewähsn un nu sidzde da un guggsd in de Rehre. Odor doof aus dor Wäsche - je nach Voranlachtung.

Guhd, bei Jobvorlud isses dann ershdema so, dass dir dor Schdaad e bißl unnor de Arme greifn dud, bisde widdor was gefundn hasd... also, wensde widdor was findn dusd! Abor ershdema wird daderfiehr gesorschd, dass de nisch vorhungorn mussd. Bei Vorlud von eim Ehebardnor isses da e bißl bleedor... da grischsde keen Ersadz vom Schdaad. Da mussd de selbor kimmorn, dass de nisch vorhungorn dusd - also, "vorhungorn" jedzde im ibordrachnen Sinn gemeend - sehlich, moralisch, segsuell! Das däde abor villeischd ma eene Idee sein - dass de bei Bardnorvorlud ooch ershdema... also, so zum Iborgang... nisch gleich Harzviere... villeischd bloß eene... ?

Nascha, jednfalls - wenn de so in de Wiesde geschiggd wirsd von deinor bishährischn Beziehung... ob nu so odor so... dann weeßde ershdema nisch so rischdisch, wos langgehn soll. Da duds dann ooch sähr vorschiedne Vorhaldensweisn gähm bei de Leide. Die een fang an zu saufn, wensses

nisch schon vorhähr gemachd ham, de annorn ziehn sisch vorn Färnsähor zurigg un grischn Debressjohnen. Widdor annre loofn Amogg odor koofn sisch vorsorschlich schonma een Schdrigg. Annre wern zum Einsiedlor. Wie isch. Un das is guhd so!

Na, wo misch mei langjährischor Bardnor - was Reischnbrandor war - wo dähr misch informierd had, dassor mid mir nisch mähr kann... - weeschn dor finanzjelln Sidduadsiohn - da habb ischooch erschdema dageschdandn, als wie als wärsch vorn Brellbogg geloofn. Meine besdn Jahre habsch hingegähm... eene Idee nach dor annorn... - danke, das wars!

Nee, isch will nisch jammorn, da duds beschdimmd Leide gähm, dies noch härdor dreffn dud, als wie misch. Abor isch muss sachn, isch bin sähr gligglisch, dass isch nach endbährungsreischor Suche widdor findisch gewordn bin - ja, eene neue Liebe is wie e neues Lähm!

Un was mor eischendlich in dor aldn Ehe schon lange vorgessn hadde - mor is wie voll Schwung un Elahn un... mor kennde widdor zwee Beeme ausreißn. Odor dreie. Also, wennse nisch allzu groß sinn... villeischd ooch viere!

Eduard Sachsenmeyer